



早稲田大学図書館  
文書 27  
E 68



癸未八月十一日香山途上口吟

東方破曉卜晴天早發高崎氣爽然  
栢木路艱初下馬峯林日出未聞蟬  
眼中劍戟攢巉岳天半雷霆吼瀑泉  
咫尺伊香踰一嶺人家遙在白

雲邊

栢木峯林皆地名

和陳養原墨江舟遊韻却寄

昨遊墨水泛扁舟今到香山最上頭  
却望江城雲路杳天風搔首嘯雲樓

憑軒手可掬銀河百尺樓頭載筆過四顧長吟  
天地窄山靈嗔妬奈吾何

十二日早起散步到泉源

藥草生何處無風山自香侵晨一散步林露沾  
衣裳清溪二里曲水氣生空涼不見人來去但  
聞彈履霜

嘯雲樓偶思墨江舟遊之興再疊前韻却  
寄黎莼齋星使

嘯雲樓欲上青天浴罷憑欄風颯然山到初秋  
猶有雪時雖盛夏少聞蟬千峯嵐氣侵窗几半

磬松聲入管絃自覺此間消俗慮未妨題壁小  
詩傳

十六日遊榛名山

清晨雨正晴香山朝旭出我將遊榛名興來氣  
騰逸當面是高根山勢何雄拔仰望白雲飛天  
風吹鬢髮上有萬頃湖眼界浩然豁群巒列其  
傍蛟龍所蟠屈山行到窮處直下蒼崖裂深谷  
幾千尋凝積太古雪境換隨觀改幽勝殊可悅  
不問近榛名挾人杉檜鬱衆壑爭奔流怪巖互  
兀凸斧鑿是神工撐天剗山骨古廟何森嚴飛

覺抽木末大石欹成門寶書久藏穴金碧燦宮  
殿精靈無時竭可知此山尊威德被萬物登壇  
一修拜狂直長廢黜默禱神應享犧牲薦芳潔  
至誠感神通吾道與天壹潛心降石階林罅森  
白日久聞榛名奇今日始療渴欲留石上題愧  
非千古筆

二十日夜半夢覺因憶予十九歲陪

先君子浴滑川溫泉有無日山中不倚樓  
何曾百事上心頭夜深疑雨知非雨一壑  
泉聲碎月流白距今二十八年悵然賦之

侍父曾登滑水樓香山今又續前遊呼醒二十  
八年夢月色灘聲相共愁

香山漫吟十首錄五

樓臺高聳白雲邊人與赤城齊比肩拔地二千

六百尺香山空翠撲衣鮮伊香高千日  
光五百尺

毛州山脈扼三國形勝居然白井墟一自伊香

屬長尾遺民猶守舊田廬管領上杉氏使長尾  
昌賢城白井以守伊

香遺民今  
猶藏券狀

鎌倉無主霸圖休誰使兩杉爭八州末路俱亡

因底事鷓蚌早被乞兒收足利成氏之殺上杉  
憲定據古河也鎌倉

無主兩上杉構關東大亂  
北條早雲乘其虛篡奪八州

平井義輪前後亡武田兵共北條強關東管領

歸真傑正氣誰當一劍霜武田晴信滅義輪北條氏康滅平井時上

杉憲政失力逃到越後以管領職讓長尾輝虎  
公公冒上杉舉大兵入關東關東將士皆歸降

猿澤猿啼不耐聞流風回首淚紛紛只今唯有

上山月依舊照來關屋雲猿澤猿上山月關屋雲指香山八勝

伊香古風 竝序

山居無事適讀萬葉集有伊香古歌其  
意雖未可盡解然大抵言男女之際其  
辭切而婉微而旨猶國風詩之遺也盖

性情根于自然咨嗟詠歎之際發為詞  
章者彼此自無異也因聊倣歌意賦古  
風七章不知果悉其情否

其一

伊香何在山之阿道路悠遠雲雨多美人如花  
不可見望雲惆悵空長歌上有丈夫山下有吾  
孀河白雲起兮綠水波夢魂飛時思欲斷吾孀  
如汝何丈夫山指男子山  
吾孀河指吾妻川

其二

伊香安在野曠山深雲霧掩地荊棘成林有美

一人在幽谷尋我欲往從無路可尋翠裙倚竹  
素手彈琴清風自至明月來臨高山流水孰為  
知音莫彈古調俯仰傷心

其三

伊香之井如九淵吐出長虹橫絕天虹雙出人  
爭觀與子矧汲同井泉一指難蔽萬人目只當  
合歡連臂眠井中之虹有時滅香水滔滔終不  
竭

其四

伊香之沼生杜若葉尖花紫何綽約誰憐此花

無所依隨波自開還自落五月六月花方新莫  
採芳根向水濱至竟妬花人何限花如有識嗔  
未嗔

其五

伊香之嶺雷鳴多此時湖上誰敢過黑雲掣電  
雨滂沱蛟龍移窟風翻波伊香今夜奈儂何

其六

伊香之風有時吹妾思君兮無斷時伊香之風  
有時止妾思君兮無窮已君不來妾心悲妾心  
悲君不知

其七

伊香之雪漫天積赤城黑髮變為白昨夜寒風  
動榛林枯茅蹈倒乳狼跡寄語阿儂慎在家雙  
嶽雖好休輕過赤城黑髮雙嶽皆山名

二十三日夜深起坐

獨坐高樓上更深露濕衣千山萬籟寂片月半  
峯飛

二十七日早起昨夜冷甚

一被重綿一被單半宵畏熱半宵寒平明未肯  
呼兒起抱子峰從枕上看抱子峰山名

香山十首

丁亥八月十二日挈妻兒避暑伊香保途  
中記所見

我家去年人皆病今年我家人悉痊官例避暑  
賜清暇豈可不遊八月天十二日晨催治裝挈  
妻提子同欣然出門直去向上野人家昧且遲  
起眠凜笛鳴兮人蟻集車輪奔駛生煤煙紅日  
一竿炫朝露風拂袂青井井田宿霧漸散遠山  
現赤城鬢髮爭呈妍鴻巢熊谷一瞬過本莊忽  
到高崎邊旣橋達時鐵路盡臨線樓上午餐傳

從此香山僱人力幌車幾輛追後先鐵車疾如  
離弦箭人車遲似逆潮船炎塵撲面紅于火纜  
存一息渴欲顛晚投香山氣清爽上方下界分  
凡仙笑顧妻孥皆無恙顏色與山相對鮮

寄妹阿順子

去年妹保科氏携二子孝一貞二自米  
澤來視母病行程七十五里二晝夜而  
達東京時八月十二日今歲余以是日  
適遊伊香保仍賦此篇以寄阿妹云

阿妹至孝出天性遠聞母病中心驚投梭下機

起上道提携二子孝與貞山河四百八十里并  
夜與晝二日程及來視母母在蓐相見無言淚  
交傾自來侍母共寢食豈無天地感至誠母日  
復常喜勿藥容顏如玉神氣平然後携兒歸故  
里營食織衣家計成阿妹將母女丈夫噫我應  
愧為汝兄去年迎妹正今日今年我向香山行  
長女在家代色養阿妹或寬思母情

贈弟小森澤君玉

君玉向者奉職海軍省前後十有五年  
鞠躬盡瘁自少屬累遷大書記官叙從



五位繼轉任參事院議官司海軍部法制賜勲四等旭日章可謂功績偉矣乙酉冬政府革制參事院廢君玉罷而候補余謂

朝廷用人必擇其才君玉年強志盛將不日復官職深望乘此閑暇來遊香山與余同養身體以為異日勤勞王事之用因賦此篇

阿弟向為海軍曹氣吞寰海何雄豪夙與五洲爭其長欲造巨艦駕鯨濤十五年間如一日鞠

躬奉職多勤勞汝今少我可五載頭髮斑々見二毛曾在內閣參機事論法究理分秋毫 聖主賞之以勲位煌々旭章賜金褒時遇革政適休職人間泰否誰能逃唯須徐養凌霄翮際會風雲重翔翺今我遊賞伊香地願將山綠染同袍此間安心真良藥待汝遠來斟松醪連床對話感今昔有時拔劍風怒號起倚層樓一長嘯赤城矗立蒼天高

八月十九日日蝕午後二時太陽自右虧至四時既暗黑如夜頃焉復故蓋百年一

回有之云因賦之

日中天無日驚呼人出庭暗黑同昏夜青空唯  
見星咫尺失人面山川視無形吐々是何變  
地陰風腥昂立香峰頂凝望窺天廷瞬間光一  
射太陽如燭螢五彩忽煥發雲色瓏玲已拂扶  
桑木又浴咸池汀一日晝夜二天鷄側耳聽久  
學天文法觀測技未靈日是君之象久照麗天  
明百年猶既蝕君子慎常經所以古之聖改過  
畏天刑

八月二十日哭弟小森澤政瑞有序

是日舊曆七月朔日吾弟政瑞殉難之  
日也余偶寓伊香保嘯雲樓茲修薄奠  
供野花新酒以招魂而祭焉戊辰之役  
政瑞奉藩主上杉侯命援東軍在奧州  
岩城平憤東軍不振進勵隊兵奮戰自  
朝至午擊退強敵遂中銃而斃時年二  
十有九藩侯嘉嘆命賜祿五十石以恤  
其後今已二十年矣恍如昨日政瑞自  
幼讀書學劍十六出繼他姓及長善騎  
操砲傍喜詩及國歌曾從藩侯于役江

戶居櫻田卽三年自戊午至庚申時方  
天下多事有處士要櫻田之變親目擊  
之能記時事筆成萬言最妙尺牘暇則  
往學於鹽谷宥陰安井息軒二翁之門  
講修經史性溫厚不與人爭頗有老成  
之風所交益廣名聲日著其歸國也事  
義親艱難持家藩侯擢為記錄所補負  
編纂米澤新史粲然可觀我兄弟中推  
為第一有一男名忠吉今來叔父小森  
澤君玉家勤學云

嘯雲樓頭雲霧昏向東遙招亡弟魂魂兮欲來  
風颯颯山木無邊帶雨翻舉杯拜跪薦薄奠天  
寒日暮啼哀猿因憶戊辰當國難誓抽丹心報  
主恩兄弟四人各奉命我捧上書叩 天闕一  
弟若松一北越汝率隊兵援東藩此戰初意清  
君側何知王師出錦旛白石連衡是私盟東軍  
不振齊羊豚汝自勵兵殊死戰奮鬪卻敵雷霆  
奔自朝至午餐無暇一身貫中砲丸痕汝軀已  
斃城忽陷陰風慘愴巖平原我主聞報淚為下  
賞功賜祿貽子孫回頭倏忽二十載當時成敗

向誰論偶遊香山遇茲日無端往事觸懷繁曾  
從藩侯役江戶獻策時務多萬言櫻田奇變親  
目擊手裁尺牘今尚存餘力就儒修經史師事  
宥陰與息軒名聲赫著交日廣語言雍々如春  
溫况冒他姓養二老辛艱持家晚結婚汝德當  
與古賢比汝風能使薄夫敦四兄弟中推第一  
馬術劍法世所尊米澤新史著成卷由來直筆  
無枉冤噫汝沒世未三十繼家有子固基根同  
宗賢叔愛佳姪並慶忠孝聚一門芬秋花兮湛  
野酒炷香長拜聲哭吞靈兮幸饗敬此祭聊摘

蕪詞代蘋蘩

寄兒大八在清國保定府蓮池書院

八月三十一日獲兒大八書信自清國  
保定府來函詳報近况因知黎莼齋君  
出貴州遵義而抵燕京途經保定與張  
廉卿會欣喜無量先是大八以四月十  
二日航海赴清國從遊蓮池書院張掌  
教之門余為乞紹介其子導岷君得入  
學導岷余之舊好也因賦二篇以寄大

八云

噫我老大無所為汝已英年遠求師渡海西入  
幽燕地負笈學道要及時張氏廉卿今偉人蓮  
池掌教育英奇令嗣導岷忘形友紹介托汝不  
相疑先生山斗人瞻仰文宗周漢修古辭已許  
門前栽桃李憶汝昂然揚秀眉如今東海水橫  
流手撐狂瀾果屬誰學問由來貴倫理汝日勉  
勗志勿移賴汝顯揚非所願願汝他年特達知  
巨鐘待叩叩即鳴囑汝勿恨就師遲

二

自汝之去日遠思魚雁杳杳來何遲自與汝別

六經月忽接尺書我心夷報道黎君來秦蜀張  
公相邀肝膽披汝與導岷同執謁談笑高堂對  
酒卮黎曰子今遠負笈子父舊好不我欺子能  
居業久有得他年顯揚果可知張曰子父未識  
面人已忠厚見其詩况與兒沆交莫逆我今視  
子均視兒情深義重感何極喜自中來不自持  
卷舒百回如面晤讀之令我忘別離莼齋經濟  
一時傑廉卿德行百世師汝生何幸事二老諄  
諄教誨皆箴規文章不朽經國業經史總是立  
身基噫汝孜孜宜勉勗慎莫成山一篲虧

香山客舍寄贈伊藤春畝相伯夏島別業  
此夕舊曆七月望明在山秋氣襲人因賦

二律

得意煙波雲水間相公居似野人閑  
虛軒臨海能容衆直道經邦豈說艱  
裴度築堂思綠野謝安對局卧東山  
蓬萊咫尺紅塵隔即是君家銷夏灣

二

豪氣銷磨舌尚存長裾無意曳朱門  
憑君偶幸陳微力笑我曾頻進直言  
老驥常懷千里志饑

鷹久侍一呼恩香山今夜秋風冷碧海遙招明月魂

余寓伊香殆將三旬宿病略癒元氣漸復  
因賦之閣筆云

自入山來詩思催人間百事皆易灰  
無日山中不閑適除眠與食唯酒杯  
一年三百六十日憂患病苦又悲哀  
有何樂事保身世唯須九夏避炎埃  
儒術修來無小補周孔之道安在哉  
素餐徒費太倉米原知我無經國才  
天意何為賦愚拙自顧自笑還自猜  
五尺形軀眇眇耳志氣恃

何欲宏恢青山相對不相語白雲出岫去又來  
自今須賦招隱士山家酒熟桂花開

A blank ledger page with a blue border and 12 vertical columns. The columns are of varying widths, with the two outermost columns being narrower than the ten central columns. The page is otherwise empty of text or markings.

--	--	--	--	--	--	--	--	--	--	--	--	--